

Polo Tesalonika Firampor Wakmwaek Kumwimp Pas

Mekia Akwapnámip Kar

Polo Korin mek yakria am yopwar fek táman ankwap pas kumwia Tesalonika mek yakápnap siosén sámip-kérép.

Ankwap fákáreao Polonámipok kar kéréprá arakrá sér: Tesalonika mekamp sios fákáre ‘Jisas Krai te wae má apár mek warko ék tenámpono’ ria ninik tokwae napon. Aenapantá maok, Pol, Sailas, Timoti makia am fárakapamp ninik fwapokwapria pas kumwi napon. Polo sérrá, “Am yae te korop mo, sikono.” Aeria maok, nánkár Jisas ék námip fek koropánk naenámp ankankan am fek kumwi námpono.

1 ¹ Taun Tesalonika mek yakápnap sios kumteouráp arop e! Yino Pol, Sailas, Timoti, makia yino má pas má kumwia, yumo Naropwar Kwar ntiaka Jisas Krai Tokwaerént koumpá yakáp nap, yiráp por kérépreano.

² Yino ninik námip te Naropwar Kwar ntia Jisas Krai Tokwae Karao námokuráp ninik fek yumwan ninikia yaewour nepo, yonkwae porokwe fek yakápenkria nampon.

Polo Kwarén aesio rimp kar

³ Ankwapyae fákáre, yino te kápae kare por yumwan ninikria Kwarén ‘Aesio’rá sér i konámpon. Yino yae-párak tak námip te, apae riteanape, yiráp mér kárakáre kareria, yumo ponankor ankákárak arop ankwap fárakapan warákár kare napo, am ninik akwapea tokwae kari yak námpan námpon.^a ⁴ Yumo tak napantá maok, yino tukuprá Kwaromp sios fákáre ou mek yiráp e sakap konámpono. Yino arakrá sér, ‘Tesalonika mekamp sios te Kwarén mér napara, man yorowar napo, nkwakwe make touwe korop námpan kor, mao mér kárakáre napara, kárakáre fek yakáp naponó’rá warákár-sér i konámpon.’^b

a 1:3 1 Te 1:2-3 b 1:4 1 Te 2:19-20

Kwaro nomwan yae-párák kare ninik fek yurukup naenámp kar

⁵Yiráp am ninik Kwaro nomwan arakrá yénkép námpon: Mao te náráp yae-párák kare ninik fek nomp ninik younkoup konámpono. Yumo Kwaro náráp firáp taokeyak naenámpan térieria, am fek touwe sámp nap táman, Kwaro yumwan am mek yakáp mwanap pwi kare pap naenámpon. ⁶Kwaro náráp yae-párák kare ninik fek yurukup naenámp te ará: Yumwan touwe tokwae sánk taeri nap aropan te nopok touwe tokwae nénk naerámpon.^c ⁷Nánkár Jisas Tokwae Karao yámar meknámp ensel kárákáre éréképea yaomwi tokwaerént érik ék námp fek maok, yumo sámpnap touwe am fwapia pap nánko, yumo yae-párák yakáprá, nomo énéngi yae-párák anepérrá yakáp mwanámpon.^d ⁸Nánkár am ke fek maok, Kwarén mér moi nap, tá nomp Jisas Tokwae Karamp Kwapwe Kare Kar wawia mántwaok paokop moinap aropan touwe tokwae kwatae nénk naenámpon.^e ⁹⁻¹⁰Jisas éknámp yae fek maok, am fárákapao sámp mwanap touwe te Kwar Tokwaeramp wae kárákáre tokwae fek Kwaromp wonae fik yakáp mon, panek yakápria maok, touwe tokwae sámpea nap te, ankár taki yaká yakáp mwanapon. Aeno arop Kwarén méria mént yakápnep fákáreráo maok Kwaromp e sakapria, ponankor man warákárapo, yumo kor énéngi tak mwanapon. Am te apae riteanápe, Kwaromp karan farákáp nánko, yumo wawia 'Kareno' riaka méri napara napon.^{f g}

Polo Tesalonika mekamp aropan kárákáre sánkanoria Kwarén sérimp kar

¹¹Yino te am yumo Kwaromp e sakap mwanap táman ninikria maok, ankár nomp Kwaro yumwan yaewouranoria kar toropwap saráp yakáp konámpon. Yumo Kwaro yumwan wumwiri námpaok paokop napan, yino ninikia, Kwaro yumwan yaewour nánko, yumo am wumwiri námpaok paokop mwanap pwi kare yakanoria Kwarén sér i konámpon. Yino te Kwaro yumwan kárákáre sánk nánko, yumo ponankor kwapwe kare tére mwaria ninik nap te, fwap yae-párák térieria, yumo Kraiséngi mér nap fek tére ponankor fwap tére mwanaponoria Kwarén sér i konámpon.^h ¹²Yumo am taknap ninik fek táman yumo nomp Tokwae Kar Jisasomp e sakap napo, tá mao kuri yiráp e sakap naenámpon. Nomp Kwar ntia nomp Tokwae Kar Jisas Kraiso mao námokuráp ninik fek yumwan ninikia yaewour nepo, yumo fwap am ankank tak mwanapon.ⁱ

Kwaromp kar ták-sinaenámp arop korop naenámp kar

2 ¹Ankwapyae fákáre, oukoumwan yino nomp Jisas Kraiso Tokwae Kar warko arákarrá ék nánko, Kwaro nomwan Jisasént ankára mek

^c 1:6 Ro 12:19 ^d 1:7 Mt 25:31 ^e 1:8 Mt 25:41; Ro 2:8 ^f 1:9 Mt 25:41,46; 2 Pi 3:7
^g 1:10 Kl 3:4 ^h 1:11 Kl 1:10 ⁱ 1:12 1 Ko 10:31

koupoukour naenámpan yumwan má kar arakrá sér mwarianeano:^j 2 Ae te arop ankwap fárakapao yumwan sérrá, “Jisas Tokwae Karamp yae te wae korop námpon!” Am te ‘Arop profet kar séri námprá sér, tá ‘Arop fárakáprá séri námprá sér, tá ‘Yino pas fek kumwiaka séri námprá sér. Arakrá sérar napo te, yumo am kar wará koupour kar kokorokoria, yiráp yae-párak yurukup i konap yonkwae kour pwar mwanape. 3 Yumo te arop ankwapao yumwan nkwakwe make kar sérarrá poupwekáp napo, kare kar napan mpweria wawi kwapono. Am yae te kwaporok korop mono. Manénkir te nomo nke nánko, kápae kare arop námokunap sokororá Kwaromp kar ták-sirirá paokop napo maok, tá Kwaromp kar ták-sir i konámp arop ankárak érik korop naenámpon. Wakmwae Jisas Tokwae Kar éknámp ke fek te am arop te yaomwi tokwae mek pik naenámpon.^k 4 Mao arop lotu i konap ankank ponankor, tá arop Kwaromp ankankrá ninik nap ponankor kwe-sirarea, námokuráp eran narek papria, Kwaromp lotu nap tokwae mek akwapá tankria sérrá, “Ono támao ono Kwarono.”^l

⁵Ono wokwae yumont yakamp fek, yumwan am kar táman sériamp te yumo te ník mo nap nie? ⁶Yumo te am ankank am Kwaromp kar ták-sir i konámp arop oukoumwan taokorámp te wae mér napon. Nánkár Kwaro pátenámp yae fek am kwekáp arop érik korop naenámpon. ⁷Kwaromp lo ták-sinaenámp te kánánkámp térerá yak námpon. Mao te kánánkámp térerá yakrá akwapea nánkár am mwae kákarnámp arop ér-sakwapnámp ke fek naenámpon. ⁸Am ke fek táman am Kwaromp kar ták-sir i konámp arop te Satanomp kárakáre fek érik korop nánko maok, Jisas Tokwae Kar ékria man náráp táp mekamp ouwipár fek porokwap-pap naenámpon. Tá mao náráp wae tokwaent érik korop námpon fek am lo ták-sinámp aropan am wae támao kwatae pap naenámpon. ⁹Mao Satanomp kwekár ninik fek nkwakwe make kárakáre, tá maomp kárakáre yénknámp kwekár ankank yoro nánko, arop ponankor am táman nkea kokorokor mwanapon.^m ¹⁰Mao nkwakwe make kwatae ninik fek kwekáránko maok, nánkár faokor mwanap arop am kar wawiaka karenorá mwanapon. Am arop fárakap te Kwaromp karan warákár napo te, Kwaro fwap warko érékép naenámpan maok námoku monoria pwar napon. ¹¹Aenapantá maok, Kwaro am Satanomp kárakárerero am fárakapan kwekáránko, am kwekár kar táman méranáponria pwarari námpon. ¹²Aenánko maok, arop ponankor kare kar karan mér moria pwarará maok, nopok kwatae ninikaokria am táman saráp warákáránkinap arop fárakap te Kwaromp kot mek touwe kwatae sámp mwanapon.

Tesalonika mekamp aropan Kwaro warko érékép naenámpan kar

¹³Aeno ankwapyae fákáre, Kwar Tokwaerao yumwan warákárámpantá yino ankár yumwan Kwarén ‘Aesio’rá sénámpon. Kwaro wokwae kar yumwan

j 2:1 1 Te 4:13-17 k 2:3 2 Te 2:8 l 2:4 Dan 11:36; Mt 24:5 m 2:9 Mt 24:24; Yé 13:13

warko érékép nanampria nánkáráp tenámpara, Yiki Kor Spiritao yoroianánko, yumwan Kwaromp arop fi arákareaka, tá yumo ankár Kwaromp kar kare wawia karenorá sénapo, Kwaro am ninik fek táman yumwan warko érékép námpon.ⁿ ¹⁴Maomp ninik te yumo ankár nomp Jisas Krai Tokwae Karamp wae tokwae ntia kárakáre tokwae mek yakáp mwanaprianánko, yino yumwan Kwapwe Kare Kar farákáp námp fek Kwaro yumwan wumwiria warko érékép námpon. ¹⁵Ankwapyae fákáre, aenámpara, yino yumwan Kwaromp kar kápae kare farákápria, kar fek sérrá, pas fek sénámp kar te, máte kare karono. Yumo am táman ankár méria kárakáre fek fokokeyakáprá ampaok kipo.^o

¹⁶Nomp Tokwae Kar Jisas Krai ntiaka nomp Naropwar Kwaro nomwan warákárria námokuráp ninik fek nomp ninik mek yaewour nepo, nomo kárakáre sámprá warákárrá yakáp námpon. Tá mao nomp méran yaewour nánko, nomo Kwaro nomwan fwapokwap kar naenámpan yépék námpon. ¹⁷Aenámpara, yino ninik námp te, Kwaro yiráp ninik mek kárakáre sánkria yaewouránko, yumo ponankor kwapwe kare ninikaokria kwapwe kare karan saráp sérarenkria námpon.^p

Yumo ankár Kwarén sénapo, ‘Yinan yaewourano’rá sériap kar

3 ¹Ankwapyae fákáre, yino warko ankwap kar sénámp te ará: Yumo ankár Kwarén kar toropwap napo, Kwaro yinan yaewouránko maok, maomp karao kor ankár némp-némp koupour akwapeaka tokwae yak nánko, mao yumo ou meknámp e tokwae sámp námp niamp, take pourouráp e tokwae sámp naenámpon. ²Yumo wae mér napon, kápae kare arop oukoumwan Kwarén mér mo napara, yumo Kwarén kar toropwap napo, kwatae ninikráp arop yinan mwaria napo, mao yinan yaewour naenámpon.^q

³Aeno Kwar Tokwae te nomwan yaewour naerámp te pwar mo i konámpara, fwap yumwan kárakáre sánkria taokeyak nánko, Satan te yumwan éréképá akwap mo, fwaponon.^r ⁴Tokwae Karao yinan ninik sáp nánko, yino yumwan wae arakrá mér námpono: Kápae kare ninik yino yumwan ‘Térenk’rá séri námp te, yumo wae takrá tére napara, nánkáráp kor yumo fwap takrá tére mwaria napon.

⁵Yinomp ninik te Tokwae Karao yiráp ninik ékéker nánko, yumo Kwaro arop fárákapan warákár kare konámp ninik mér karia maok, Kraiomp touwe sámpea kárakáre fek fokokeyak konámp ninikan kor mér karenkria námpon.^s

Ponankor aropao tére mwanap kar

⁶Ankwapyae fákáre, nomp Jisas Krai Tokwae Karao yinan sénánko, yumwan kárakáre fek sérreano: Arop ankwapao tére moitea kokwaenámp

ⁿ 2:13 Ef 1:4-5; 1 Te 1:4; 1 Pi 1:2 ^o 2:15 Ro 8:30; 1 Ko 16:13 ^p 2:16-17 2 Ko 1:3; Hi 13:21 ^q 3:1-2 Ro 15:30-31; Ef 6:19 ^r 3:3 Jo 17:15 ^s 3:5 Hi 12:2

ninik fek yarakriaka yino yumwan farákápnámp kar ampaok yarak mo, pwar nánko te, yumo kor mént paokopria mántwaok mwanape, ankár panek yakáp kipo.^t ⁷Yumo te ankár yinomp ninikaok paokop mwanap wae mér napon. Wokwaek kar yino yumont yakápámp fek te, yino kwaporok tankáp moimpon. ⁸Yino te fir ankwap yiráp yaekamp kwaporok sámpea fár moimpon. Yino ankár mani fek saráp sámp konámpon. Yino ankár yinoku kor yámaraok kumuruk kor yinokump yae fek térea waeria maok, yumwan ‘Fir sápenk’ ria kar sér moimpon.^u ⁹Yino te yumwan Kwaromp kar farákáprá térea wae námpara, ‘Nopok fir sápenk’rá sér mwanámpan maok, yino te takrá sér mono. Yino mak nánko maok, yumo yinomp ninik man nkea yumo kor mántwaok takrá tére mwanapria ninámpon. ¹⁰Yumo te wae mér napon, yino wokwaek yumont yakria yumwan sánkámp lo kar te arakrá sérimpon: Arop námo tére te monoria námp te, mao fir sámpá fár mono.

¹¹Am te apae riteanápe, yino wa nánko, arop ankwap fárákap tére mo, kwaporok párák yakápria ankwapao térenap ankankan énounkouprá sérarrá paokop napantá sénámpon. ¹²Oukoumwan te yino Jisas Kraiss Tokwae Karamp e fek am taknap arop fárákapan kar kárákare fek arakrá sénámpon: Am fárákap te ankár fwapi tankáprá téreteria maok, fwap námoku taokeyakápria fir sámp mwanapon.^v ¹³Aeno ankwapyae fákáre, yumo kwapwe kare ninik fek tére nap te kokwae kwapono.

¹⁴Táte arop ankwapao yino kumwinámp pas fekamp kar ponankor má mériaka mántwaok yarak mo nánko te, yumo am aropan fwapia mérria, man kwaporok pwate napo, námoku mwar yakriaka námokunámp ninik am mériaka pwarápe naenámpon. ¹⁵Yino te yumwan, mao te nomo man yopornámp aroponorá ninikia pwar kipria sér mono. Yinomp ankwapnáprá ninikria maomp ninik fwapokwap kipo.

Polo Tesalonika firan ‘Gude’rá sénámp kar

¹⁶Tokwae Kar te yonkwae porokwe fek yakáp i konap ninik fi kor ara, onomp ninik te, nkwakwe make ankank korop námpan kor, mao yumwan yonkwae porokwe nénk nánko, yumo yonkwae porokwe fek yakápenkria nampon. Mao te ponankor yumont yakanoria nampon.^w

¹⁷Pol onoku yumwan ‘Gude’rá kumwi rae. Ono ankár onomp pas ponankor pwar námp fek onokump yae fek mámake pourouráp kar kumwi konampono.^x

¹⁸Ono ninik namp te, Nomp Tokwae Kar Jisas Kraiss námoku ninikia yumwan yaewouranoria nampon.

^t 3:6 1 Te 5:14 ^u 3:7-8 1 Te 2:9 ^v 3:12 1 Ko 15:58; Ga 6:9 ^w 3:16 Jo 14:27

^x 3:17 1 Ko 16:21